

VIDA NEWS

Nota informativo Vidanova, 2025-01

E nota informativo di bo Fondo di Penshun Vidanova.



Lista pa chèk penshun: tur loke bo mester sa promé i durante bo penshun

Ganadonan di nos kompetensia di krusigrama!

Datonan estadístiko di Fondo di Penshun Vidanova

Deskubrí e komodidat di nos portal di partisipante: bo penshun semper na bo alkanse

*Felis
Aña Nobo*

Lesá tokante e funshonnan útil di nos portal di partisipante i deskubrí kon bo por maneha bo datonan fasilmente, prosesá kambionan i haña un bista riba e konsekuensianan finansiero di bo eskoho. Asinaki bo tin informashon di penshun semper na bo alkanse. Nos lista pa chèk penshun tambe ta duna un bista di tur e kosnan importante ku bo mester tene kuenta kuné promé i durante bo penshun. Finalmente, nos lo anunsiá e ganadónan di nos krusigrama i bo por mira nos datonan estadístiko mas resien.

Disfrutá!

Bo mihó opshon
pa penshun

vidanova
PENSION FUND



Lista pa chèk penshun: tur loke bo mester sa promé i durante bo penshun

Bo ta serka di bai ku penshun òf bo a baha ku penshun kaba. E manera ku bo ta risibí bo entrada, ta kambia. Na lugá di salario awor bo ta risibí un suma di penshun. Tur kos ta sinti nobo, komosifuera bo ta bèk den bankinan di skol. Pero no prekupá! Nos a ordená tur kos pa bo, di moda ku bo por gosa di bo penshun ku un kurason trankil, sin ku bo tin di prekupá si tur dokumentashon ta na òrdu. Asina na fin di luna bo ta sigur di un entrada.

Kiko bo mester tene kuenta kuné? Sigui lesa pa deskubrí kua situashon ta aplikabel pa bo.

“Pronto mi ta bai ku penshun i mi ke sa kon kos ta pará”

For di e momento ku a mèldu bo na e fondo, bo ta haña un kuenta riba nos portal di partisipante kaminda bo por konsultá tur bo informashon. Via e portal di partisipante aki bo por apliká tambe pa bo penshun promé ku bo baha ku penshun. Aki bo ta yena e informashon nesario digitalmente. Asina nos ta haña bo datonan ku nos mester pa por paga bo penshun. Pensa por ehèmpel riba bo

datonan bankario. Esaki bo mester hasi minimalmente un luna promé ku bo fecha di penshun.

Mas informashon tokante nos portal di partisipante ta wòrdu duná den nos siguiente artíkulo, *“Deskubrí e komodidat di nos portal di partisipante: bo penshun semper na alkanse”*.

“Mi tin mas fuente di entrada”

Si bo tin mas fuente di entrada, bo mester laga nos sa. Hasiendo esei bo ta evitá ku ta apliká dòbel e deskuento básiko i e sobresuèldu pa hende di edat si a apliká esaki kaba na un otro fuente di entrada, di moda ku despues bo no tin nodi paga aserka na un evaluashon definitivo di impuesto di entrada. Ademas, bo mester yena e formulario di deklarashon di impuesto di suèldu tambe. Por haña e deklarashon di impuesto di suèldu riba nos portal.

“Mi entrada ta ménos ku 1.000 florin pa luna”

Ora bo entrada – inkluso otro entrada ku podisé bo lo tin banda di bo penshun – ta menos ku 1.000 florin, bo mester mèldu esei na nos. Ku e informashon aki nos por determiná si nos mester retené e prima di BVZ.

“Mi ta risibí tantu un penshun di Vidanova komo e penshun di AOV di SVB”

Den e kaso aki nos ta invitá bo pa yena e datonan aki riba nos portal di partisipante. Ku esaki nos por retené e prima pa e seguro básiko pa gastunan médiko (BVZ) i eventualmente tambe e impuesto di suèldu enkuanto e suma total di e dos penshunnan. Asina bo ta evitá ku na final di aña bo mester paga aserka.

“Mi ta muda pa eksterior”

No lubidá di informá nos ora bo muda pa eksterior. Tambe manda nos un prueba di registrashon i bo datonan nobo di kontakto. Asina nos por tene bo na altura di desaroyonan ku ta relevante pa bo i kaminda ta nesario adaptá e retenshonnan obligatorio pa lei.

“Un miembro di mi famia, ku ta risibí un penshun di Vidanova, a fayesé”

Den kaso di fayesementu mester informá nos inmediatamente. Nos mester di e prueba di fayesementu mas lihé posibel, di moda ku no solamente nos por para e penshun, pero nos por regla tambe e eventual penshun di biuda i/òf wérfano i plaka di pena.

“Tin un kambio den mi situashon personal, ku por tin influensia riba mi penshun”


Si tin un kambio den bo situashon ku por tin influensia riba bo penshun, perkurá e ora ei pa mèldu esaki na nos promé ku e di dos dia di e luna. Si mèldu mas lat por nifiká ku ta prosesá e kambio aki te fin di e siguiente luna.

“A para mi penshun pasobra mi a entregá mi ‘Attestatie de Vita’ lat”

Den e kaso aki bo mester manda e ‘Attestatie de Vita’ mas rápido posibel pa nos òf pasa serka nos na ofisina. Na final di e siguiente luna ta prosesá e kambionan i e pago ta sigui na final di e luna ei.

“E luna aki mi a risibí ménos penshun òf nada mes”

Si e luna aki bo a risibí ménos òf nada mes di penshun, semper tin un motibu. Esaki por ta pa motibu ku nos no a risibí bo ‘Attestatie de Vita’ (na tempu), òf pa rasonnan tékniko di impuesto. Den e kaso ei tuma kontakto mas lihé posibel ku un di nos koleganan.



Masha Pabier!!



Fondo di Penshun Vidanova ta felistá tur ganado di nos kompetensia di krusigrama!

Alabes nos ta yama danki na tur penshonado ku a partisipá! Riba e potrètnan por mira kaminda nos koleganan i miembro di Hunta di Supervishon ta hasi entrega di e premionan na nos ganadonan.

E promé premio tabata un estadia di 1 wikènt pa 2 persona na The Rif at Mangrove Beach Corendon Curaçao i na Van der Valk Plaza Beach Resort Bonaire. E di dos premio tabata un 'giftcard' di un restorant di nan eskoho.

Datonan estadístiko di Fondo di Penshun Vidanova riba 30 di sèptèmber 2024

Dia 30 di sèptèmber 2024, e fondo su datonan tabata lo siguiente:

	31 december 2023	30 sèptèmber 2024
Spònsenan	95	97
Partisipantenan aktivo	2936	2900
Partisipantenan ku no ta paga prima mas	3183	3258
Penshonadonan	1817	1902
Kapital di penshun	1103 mln.	1145 mln.
Obligashonnan di penshun	1039 mln.	1069 mln.
Reservanan	64 mln.	76 mln.
Empleadonan	20	20
Grado di kobertura	106%	106%

(E sumanan ta monta miles di florin Antiano)

Durante e promé 9 lunanan di aña 2024, 2 kompania nobo a afiliá na e fondo. Ku apeser di e 2 kompania nan aki, nos ta mira ku a kantidat di partisipante aktivo a baha, ta debí ku na otro banda, hopi partisipante aktivo a kita for di trabou. Esaki ta keda reflehá tambe den un subida di e kantidat di partisipantenan ku no ta paga prima mas. Mas aleu, hopi partisipante a yega e edat di penshun loke ta evidente den e subida den e kantidat di penshonadonan. E obligashonnan pa penshun a subi. Nos ta mira tambe un oumentu di e kapital di penshun i di e reservanan. E e grado di kobertura a keda igual.

Deskubrí e **komodidat** di nos portal di partisipante: bo penshun **semper na bo alkanse**

Spar pa un penshun ta un asunto importante. Sin un penshun òf un otro fuente di entrada despues di alkansá e edat pa penshun, ta nifiká den mayoria kaso ku na edat mas haltu tambe bo tin ku sigui traha. P'esei ta esensial pa plania bo penshun bon i pa keda al tantu semper di kiko bo a akumulá na penshun. Ku e pensamentu aki na mente nos a krea e portal di partisipante. Su meta ta pa fasilítá bo bida i pa pèrkurá ku semper bo ta bon informá enkuanto bo futuro finansiero despues di yega e edat di penshun.

Nos portal ta brinda un kantidat di posibilidat. Usand'é bon, den un fregá di wowo bo por haña kontesta riba bo preguntanan, sin masha esfuerso. E portal ta duna bo e posibilidat na kada momento, unda ku bo ta, pa regla i sigui bo asuntunan di penshun. Den e artíkulo aki nos ta trata e akshonnan mas importante ku bo por ehekutá atraves di nos portal.

Kon bo ta haña aksesu na e portal di partisipante?

Na momento ku bo ta partisipante di Vidanova, nos ta traha un kuenta pa bo riba nos portal di partisipante. Un di nos koleganan lo manda bo datonan personal di aksesu na bo e-mail adrès. For di e momento ei djis ku un klek tur bo asuntunan di penshun ta na bo alkanse.

Si bo ta partisipante di basta aña kaba, pero bo no tin e datonan di aksesu mas na man, tuma kontakto ku nos. Un di nos koleganan gustosamente ta yuda bo.

Bo 'dashboard' personal

Unabes ku bo a haña aksesu na e portal, bo ta bini den bo 'dashboard' personal kaminda bo ta haña un resúmen

di tur informashon importante tokante bo penshun. Por ehèmpel, bo ta mira bo datonan personal, e haltura di bo penshun i dokumentonan importante, manera bo resúmennan di penshun.

Ta importante pa na promé momento di aksesu bo kontrolá si bo informashon personal ta korekto. Si bo datonan no ta kuadra, bo mes por adaptá nan simplemente atraves di e portal. Kontrolá regularmente si bo datonan ta al dia, pa evitá ku despues bo ta topa ku sorpresa. Esei ta importante spesialmente ora surgi un kambio den bo situashon personal. Informashon inkorekto por konduzí na un situashon ku bo no ta haña e mensahenan òf na diferensia entre e datonan den bo 'dashboard' i bo pago real di penshun.

Bista den haltura di bo penshun

Den bo 'dashboard' bo ta mira e haltura di bo penshun, basá riba bo salario aktual. Si bo primi na e parti aki, bo ta yega na un página kaminda bo por mira e haltura antisipá di bo penshun na e fecha ku bo ta baha ku penshun. Ademas bo por wak kiko bo parientenan lo risibí den kaso ku bo

fayesé, i kiko lo sosodé si bo bira inkapas pa traha. Bo ta haña un bista tambe di e konsekuensianan finansiero di e diferente opshonnan ku bo tin. Por ehèmpel, bo ke baha ku penshun mas trempan òf mas lat? Òf bo ke entrekambiá e penshun di bo partner pa un penshun adishonal di behes? E portal ta duna bo un idea di e konsekuensianan di tur e eskohonan aki.

Dokumentonan importante

E portal ta kontené tambe dokumento importante, manera bo resúmennan anual di penshun. Bo por wak i deskargá nan ora bo mester di nan. E portal ta yuda bo spar tempu ora bo ta en buska di informashon importante tokante bo penshun.

Plannan pa futuro

Tur e informashon aki ta pone ku bo por plania bon di antemano. Ya den un fase trempan bo por wak kon bo situashon finansiero lo ta despues. Si bo ta kontentu ku loke bo ta mira, esei ta krea sigur un sintimentu tranquil. Sinembargo, si bo ke spar mas pa despues, e ora ei tin diferente posibilidat pa provishonnan adishonal. Por

pensa riba seguro di bida komplementario pa apartá plaka èkstra òf pa spar èkstra den bo areglo di penshun.

Bo futuro finansiero den bon man

Bo ta meresé stabilitat finansiero, tambe despues ku bo a baha ku penshun. P'esei tin di keda tene bo situashon bon na bista atraves di nos portal di partisipante. Nos koleganan tur ora ta para kla pa guia bo riba nos portal i pa sostené bo kaminda esei ta nesario.





vidanova PENSION FUND

Bo mihó opshon pa penshun

Vidanova Pension Fund Foundation, Schottegatweg Oost 28, Curaçao, P.O. Box 527
Phone + Whatsapp (+599 9) 734 4200, Fax (+599 9) 736 54 99, E-mail: info@vidanova.net

www.vidanova-group.com

